



題畫松

我夢遊徂來長松落落千尺材我夢遊黃山黃山之松
尤老頑夢醒忽失松所在急追寫向銀光紙看來不是
夢中松鬚鬚總帶虬髯容筆之所到成鬱葱張向蕭齋
素壁上時有蒼鷹來踏空

購梅二十本植學舍前書以自嘲因懷故園梅花
購得官閣梅柔條僅盈尺商量掘臼科分向莎階植望
此纖小枝他年爛成雪自笑負襜褕殘年過六十濫竽
作儒官五年此偷息昔歲入括蒼半載襍被出明年復

後年未卜留與別此如邂逅交俄頃成南北傳舍作菟
裘營謀亦已拙

我家浣溪西田廬頗云具有桑復有竹有梅十三樹手
植三十年一一溪深處出入香雪中門庭好遮護自我
來綢州五載濶良晤去臘謁墓歸山園聊引步藤蔓縈
絡之高柯半僵仆除蔓如追逋拉朽剔其蠹此時應發
舒橫斜復如故拋却故園花曰歸嘆遲暮

學舍中烏桕樹

一株烏桕拂簷長半倚虛廊半覆牆脫葉零時窻有日

疎紅留處瓦餘霜因依精舍空蕭颯點綴秋山便老蒼
記得故園攜杖處鵲巢曾認水南莊

學圃督種秋菜

齋中僮約法新添剗削花畦作菜田挑甲還需殘雪裏
立苗宜趁杪秋天區隣曲檻藩籬易地近莎階採摘便
老瓦盆中兼味少只愁羊蹴夜驚眠

讀陶集二首

五斗不折腰饑來寧乞食人所諱言者言之無矯飾卽
此徵道心彌見存養直奔走形勢途其辱寧止乞馬廐

苦修容刺門甘屈膝出則氣發揚入則形戰慄冰炭交
于中此情豈堪述乞人常坦如去留無畛域雖云拙言
詞矢口明報德是以千金軀不向小兒折

饑寒在生前聲名在身後二者不相待士窮乃固有靖

節懷其寶

陶詩云客養千金軀臨化消其寶

韜光忍含垢託跡糟醜鄉

一生杯在手人知曠達懷不知苦節守漉酒一頭巾當
門五株柳夔然曠百世獨立誰與偶

遣懷

哦松日日小牕凭落寞應同署尾丞僕爲客稀閒種菜

妻嘲官逸冷如冰情知宦海都無着願作人間百不能
回首廿年前度夢翩翩裘馬記吾曾

冬日江行舊作

一棹遄征晚森森夜景澄漸聞官渡柁遙見戍樓燈帆
落投荒柳江流帶斷冰倚篷埽殘雪佇待月東升

冬晴卽事

一室埽虛白時晴曉色中鵲聲穿樹喜日彩潑窗紅得
句味方永撚髭字未工瓶花有生意借取硯牀東

再用前韻一首

曝背南軒下攤書老樹東
樹頭餘落葉書卷故留紅
晷影移晴竹茶烟颺午風
此間一跌坐無事卽禪叢

括蒼舊作

山外亂山橫萬山圍一城
三春常挾纒四月始聞鶯
地少蠶桑稅邨緣麻苧成
夏河最幽曠有客挂帆行

秋草

寒蕪成一片無復醉蜻蜓
霜下不留翠春時曾踏青
馬嘶黃葉路蟲語夕陽亭
烟雨迷離處池塘夢未醒

戲贈同寅俞伊蒿

帶經而鋤行入仕伊蒿得之名譽起
先生少時把長鏡肩覆短衣不掩體
有時甕牖聲咿唔拄腹撐腸一寸薺
秋闈揭曉喧如雷一騎飛投疾于矢
先生腰鎌方刈穫曲突無烟釜無米
唐昌山水窮僻處茂實英聲動隣里
嗣是遨遊志四方服有裘兮乘有軌
十年偕計賦閑居扁舟棹入珠江水
彈鋏歸來不得意閉戶讀書仍隱几
兩上

鸞坡謁選曹

吳命重申老博士

四載綢州蒔苜蓿我與先生居比屋頃聞將及賦驪駒
 贈章聊代春波曲不唱陽關柳色青碎語危言毋捧腹
 先生有婢工採菽先生之書多借讀蹴圃今無博士羊
 充庖長享幽人祿東坡以薺菜為幽人山居之祿先生家人常出採野菜晚餐常
 恐及崦嵫晷影乘餘不繼燭不速之客三人來一飯矜
 嚴舌常縮人謂先生不世情我謂先生儉不俗誦君自
 述伊蒿行小字蠅頭歌當哭感予三日心怦怦同此煩
 憂戰寒燠生不能挽五石弓儒冠何由厭梁肉麤衣淡
 飯飽即休羨君生平有檢束行看臯比藹春風桃李紛

紛爛盈目願君早貯雙荷葉待長階前數枝玉

聞寅友馬藕塘廣文樞過金華詩以哭之

蕭蕭風打白楊天丹旒聞過穀水邊偕我昔年尋舊雨
 驚君此日赴黃泉家無長物貧非病牖下幽魂極可憐
 留得庭階雙鶯鶯公二子榭榭俱有文名榮光應到墓門前

郡邸即事舊作了不記憶矣昨從故紙中錄之

濕薪爆竹烟盈几惡隸填門語更譁詩思退于風掃籜
 睡魔來似客歸家五更鄉夢驚飛蝶十日春霖撒亂麻
 趁曉擬趨公府去蹙蹙轅鼓已三撾

五官咏

官僕

應門狐假虎投刺入仍留俄頃成冰炭關通此咽喉回
旋公喜怒娛弄主俳優此處官離局攜裝過別舟

官吏

塵案如山積親民大是難問囚先問稿由吏不由官翻
手雲為雨穿人鐵作肝春臺有旭日不照窶人寒

官差

當官作鼠伏持票若鷹揚不剜心頭肉難消狗臉霜貸

錢空破竈積貫飽奚囊擬待回官去農忙正插秧

官幕

咕嗶科名滯相將覓後門俗以作幕為讀書人後門上
又以幕賓得賄為開後門

場難擱筆人以幕賓失館為擱筆窮到處可稱尊習染妝官樣渾忘

齧菜根莫輕三寸管案牘有驚魂

官親

察廉知六計蔽目畏三爺衙內以舅爺姑爺少爺為三爺任爾臺懸鏡

難明霧隱花葭葶原有屬南北儼分衙攤飽私囊去生

魚尚自誇

楊州詩集卷四
弔宗忠簡公祠堂

烏傷縣

留守忠魂卷逝波烏傷遺廟傍山阿章餘十上虛迴輦
淚盡三聲喚渡河壯志久灰吳會小將才早識岳侯多
汪黃誤國由天意空負英雄夜枕戈

題永慕祠

秦孝子顏烏
葬父墓古蹟

羣山磽秃濁流黃永慕祠堂入莽蒼此地共傳秦孝子
縣名猶說古烏傷歲時設祭來官吏老樹當門翳夕陽
秦火不燒天性擎巋然兩塚永相望

岳侯墓

湖壩之樹何蒼蒼北枝鬱曲南枝長此是前朝岳侯墓
風雲慘澹神旗揚二帝蒙塵侯之恥迅掃金人日三徙
誓抵黃龍返兩宮背嵬之軍銳於矢欽宗復辟思陵忌
長子率師非重寄總緣和議據胸中一日金牌行十二
不然君臣膠漆同曾將赤幟表精忠任羅織成三字獄
豈真奸黨亂宸聰賊檜逃歸岳侯死茲事由來奉上旨
小朝自壞萬里城獄吏奉行一片紙嗚呼精忠字御筆
書三字獄賊檜口顛倒功罪莫須有自此無人梗和議
一德之閣高插斗金題又賜孽窠字矯誣上天抑何醜

賊檜逃死將軍施將軍名全以校刺檜不克死後無愚智欲殺之種
樹祠前分檜屍樹為明同知馬偉所植鑄象跪竦布檜肢都指揮李隆鑄
檜象跪墓前淋以穢溺擊以椎婦孺唾罵如報私千萬世後
當如斯惟侯在天為列星惟侯之墓永尸祝鐵鑄檜狀
劫不消此即地下阿鼻獄

醉鄉引

老我不能飲三爵輒頽然喜與糟邱生拍浮稱齊肩暇
則命其儔醉則全其天鷲入醉鄉去渺若升雲煙此間
好風俗淳悶羲皇前作事無機械心地少頗偏熙來并

攘往清濁皆聖賢一得此中趣其樂難言宣窶者忘其
窘謫者忘其遷阨者忘其遇老者忘其年高歌泣鬼神
有詩可百篇落筆搖五嶽有書挾飛仙山因之而欲笑
花因之而增妍風因之而浩蕩月因之而無邊淚亦不
能為之墮憂亦不能為之煎興來騰身跨汗漫高挹北
斗捫星躔有時散髮入大荒化作長鯨吸百川不似武
陵源北陌界南阡猶記秦氏亂舊事傷屯邅不似舍衛
國絕滅求真筌雖稱極樂世戒行同拘孥曷若此間大
自在操卮挈榼無古無今直與高穹厚地元氣相周旋

我生無他願願乞玉皇封我侯酒泉任衆人醒我獨醉
此鄉于我無悶焉

小雪卽景

朔風連日鳴地籟四海同雲如倚蓋龍公不肯撒手行
檜頂松梢寫雪意有如畫家薄皴法暈開一筆寒烟外
我方呵硯寫新詩牕戀晴光未稱快且浮綠蟻煖紅鑪
那管尋常還酒債

悼亡舊作

哭亡室章孺人

腸斷秋風淚滿襟結禱人去拆瑤笙茱萸黃菊憑誰薦

一盞寒泉稚子擎

秋闈猶望捷音歸病到無言願永違我未成名君早逝
可堪回首泣牛衣

寂寞絺帷衾影單芳魂想像獨憑欄蕭蕭卧內西牕竹
猶似風翻翠袖寒

風雨鷄鳴慰寂寥今成追憶黯魂銷課兒伴我深宵讀
雪案燈昏手代挑

北堂時惕風驚燭問侍頻偕響珮環今日傷心難遣處
高堂垂白哭紅顏

梅地言錄卷四
兒女頻年付草萊辛勤襁褓我心摧應知今日重泉下
一隊殤兒索母來

烏傷縣作歌七首做少陵同谷縣作

有客有客老無齒懷抱鉛槧去鄉里身着黃絲八尺布
日糴市墟五升米有文供人作覆瓿有官常受薄俗詆
嗚呼一歌兮歌吞聲有懷不盡區區情

父兮父兮早棄孤熒熒在疚守舊廬小人有母病切膚
三年牀蓐痛不蘓兒官一命告泉壤欲養不待空嗟吁
嗚呼二歌兮歌聲杳盈盈血淚灑林表

伯也無嗣痛早亡一子嗣之心恐惶嗟予季兮復摧折
遺孤纍纍口始黃卵而翼之予口瘖羽毛成兮分飛翔
嗚呼三歌兮歌悽惻汝伯頭毛今非昔

頻年潦倒無窮已壯歲歌妻還哭子卅載之間兩鼓盈
槁木形骸塊然耳中夜聞雞心悄然猶抱殘編拂衣起
嗚呼四歌兮歌已哀秋風颯颯生庭槐

十年車馬長安道盲風朔雪催人老鷓鴣裘敝怕入門
坐不爲炊愧邱嫂諍語入耳不忍聞翻羨出門羈旅好
嗚呼五歌兮歌已迫此身安得排風翮

亂山稠疊多風雨落葉歸鴉不可數當門惡棘長于人
入畏驚蛇出畏虎黃昏月黑山鬼嘯寂寂官衙警無鼓
嗚呼六歌兮歌復長我所思兮在故鄉
誰能長繩繫白日壯不如人老何益早識功名鮎上竿
何況雙輪鳥飛疾活火難然心死灰此生不鼓侯門瑟
嗚呼七歌兮歌曲終仰視浮雲行蒼穹

課兒句讀喜作

阿斌生小不受束奔突叫嘯如生鹿垂老之兒等舐犢
癡頑時復弛鞭朴亦須俾識五與六授以一編學把讀

初到口如刀刮竹格格不吐舌猶縮馴而復之鋸截木
循環雜誦望至朔蟬聯脫卸車運轂差喜轉喉翻水熟
自辰歷酉半日足騎竹作馬任馳逐老夫課罷便捧腹
一盞春醪進醺醪

連日風雪坤兒攜幼孩到署喜作

同雲積夕暗風沙忽見簷前鵲報衙入抱喜看雙稚玉
盈眸藉慰老昏花歸來白雪方飄絮生及芳苓正吐葩

銑孫生六月廿六日

不爲吟詩頻側耳燈前愛聽語嘔啞

六十衰翁幸有孫安排湯餅擬開樽先慈憐我生兒晚

長男嗣伯兄後年今日慚予大父尊紫硯未穿庸肯棄
踰四十始舉坤兒
青氈雖故不妨存他年裕後全需此問舍求田且漫論

岱山弟充貢喜作七律二章寄之

憶昔蕭齋赴課年知君頭角便崢然論文目想驪黃外
落筆心游邃古前三五六經窮闕奧下中上舍遞超遷
盛朝詎有遺賢嘆難得

恩榮及第先

聽說吾門樹彩旗羈人應動故園思我方念叔垂黃髮
君克承歡表白眉五斗自慚成老退二難差喜得壘簾

晉陽弟亦將次充貢阿兄懶散猶能飲待潤枯腸酒一危

庚午正月十四日晉陽弟來晤留一日而別步送

至郊外老境傷離爲之愴然是歲晉陽年五十
矣因卽事賦二十韻寄祝初度

昨日觀燈賞元夕曉對離筵與君別三杯卯酒割愁腸
送君東過垂楊陌陌頭楊柳青猗猗樹杪春禽鳴格格
老懷潦倒不可盡對景傷離益愴惻臨歧握手言丁寧
總得一二忘九十望君徑穿坡隴去莽莽荒郊剩影隻
伯勞西飛燕東飛俄頃雲山渺曠隔異鄉聚首易生感

梅地言錄卷四
別後翻令念疇昔憶君早歲遭坎壈壯志長伸氣不抑
曲突常無薪火紅芸牕剩有囊螢碧懶從薄俗潤膏梁
仰荷

天庾頒粟粒從茲漸復舊田廬富不以鄰廩有穡喜今
五十逢初度瀟灑丰姿尙玉立惟予老大成衰朽頻年
濫竽槐市側自來臭味無差池况復荆花一本植昔時
相比如駢蛩此日相違等楚越胸懷空自蟠車輪風雨
何由對床席欲持柏葉侑一觴迢遞關山那可卽此篇
藉作介壽詩簡易無多爲君說不祝翁子富貴年願學

蘧賢懋厥德

兒輩營葬

先君邱隴畢來告蕝事時恭遇

覃恩馳贈

敕命將歸展墓書以示之

羈留自嘆久離鄉墟墓經營賴汝當四尺未親封馬鬣

百年抱憾滯烏傷

時屆學使按臨婺郡不獲旬里親營葬事新塋

錫命光泉壤寒食風花遍野棠爲掃松楸尋丈地安排
牲醴待焚黃

赤城卜葬本生母章孺人于湊塘之麓遙哭以詩

憶昔年華逢己亥涼秋九月汝歸真輓歌蒿里餘編在

予有悼亡十絕今刪存六首彈指流光宿草陳此日青山卿奠魄他

時黃壤我誰鄰婦姑地下初謀面孺人歿十餘年而亡媳傅氏來歸今與孺

人合兆應似人間笑語親

庚午季冬卜葬繼室俞孺人於溱塘之麓與章孺

人合兆域焉賦二律以補悼亡

抱痛三年侍北堂先慈患癰三載孺人入則含笑承歡出則背人揮淚見者皆為之流涕也

暗中制淚默神傷辛勤進藥烏含哺刻苦持家蟹績筐

為我頻年走塵鞅累君一病入膏肓當時相對彌留際

獨視遺孤賚恨長

窀穸重扞卜允臧芳魂有伴莫悽惶生前未面參商似

地下相隨姊妹行同穴永違偕老願合塋翻羨耦俱長

殘年自問成枯槁老淚猶揮酌一觴

李家陽酌墓詩先兄沛園亡弟紫封合墓

昔年此地同遊釣向與紫封今日傷心展墓來共許文

章符杞梓先兄遊庠後受業天台齊息園宗伯名噪藝林亡弟紫封亦早歲遊庠勤學工書法儕輩

共推一可堪先後赴泉臺焄蒿滿眼雙鴿杳風雨離羣

一雁哀薄宦烏傷知念否一科終老已心灰先兄肄業武林時寄

書以科名相勗猶記有龍角逢春
雨而新鳳羽遇秋風而振之句

戊辰營葬 先君至庚午正月葬亡室章孺人暨

亡媳傅氏十月葬先兄暨亡弟紫封十二月合

葬繼室俞孺人于章墓三年之內計三世七棺

俱歸兆域欣戚交併書示兒子赤城猶子穀城

纍纍浮屠積經年回首家山爲黯然自嘆一官等匏繫
幸今三世卜牛眠昔時蓉鏡空塵夢此日蘭階望後賢
相約春秋同上塚多栽佳樹墓門前

述哀詩

生小依親膝未曾一日離至樂初不識兄弟羣戲嬉吾
父篤友愛家督煩肩仔早謝棘闈試終日心怡怡爲叔
勤作室爲叔卜婚期堂前五荆樹一一春風吹指繁泣
分爨一飯猶陪隨吾兄邁篤疾動息需參耆是風一朝
勁折斷瓊瑤枝兄夙擅文藝吾父竒愛之既抱喪明痛
鵬鳥臨庭階扶床憐弟弱支戶仗母慈吾母亦已邁轉
輾含悲思三載卧床席患癰竟不治變少蹇童試雜好
投朋儕嚴君既早背痛憤始下帷挈弟會盍簪戰藝爭
雄雌自抱終天痛家計勞如絲弟復先我逝隻影傷心

脾婦子如沸羹嗃嗃相詬訾始念十載前蔭苾皆母儀
念親既違養負親痛轉滋歷數遭遇艱難答親恩施廿
八始採芹吾父冥不知四十忝賢書吾母已見遺一年
擇山陽六載繡水涯忝竊一命榮奉檄當慰誰于役走
塵鞅婺郡苦留羈臨葬不紼棺設祭已後時報親期後
日兒年亦已衰負親傷往日已往不可追椎胸盡傷心
泣涕徒漣而恭逢

堯舜朝

壽域敷天開

推恩逮一命

紫誥鋪金泥虔舉焚黃禮敬酌澆山巵告親墟墓間血
淚盈巖隈誓將去烏傷廬墓伸餘哀雖云幽冥隔魂夢
仍相依

予不到富春有年矣聞章紉齋內兄二子丹亭順
之游庠賦詩喜贈

憶昔弱冠年時游富春邑君家盛賓朋車馬紛絡繹相
慶朋盍簪我作東牀客外舅愛我甚砥礪遭拂拭君時
方髫齡垂垂髮覆額世好如朱陳主客屢忘跡君家兄

弟三雁行我驂一雅謔靡不為每至笑言劇伯氏仕咸陽關山久曠隔君為博士員杜門茂學殖惟予局吏隱雲樹渺東北迴遡昔年歡舉頭看明月頃聞渥洼產游庠得雙璧聞之已後時

正月間晉陽弟來署始知丹亭順之姪去秋游庠之信

踰

限齒折屐聿計丙歲春辭行過廣宅二子肩隨行問年

纔典謁屈指曾幾時眼見弁而突古藻冠時流

聞富邑應童試

古學者惟丹亭兄弟三人

瓣香傳祖德况多韓鄂枝

謂伯詠姪

聯翩響鳴

鏘風雅萃一門三發兩中的遙知順風羽不作退飛鷁老我耽閒吟驚聞氣先奪他年歸去來訪舊我來即藉

作忘年交唱和璣瓏碧

璣瓏山館為紉齋別業擅溪山之勝

晨起

晨起露方泣清風吹竹閣庭院悄無人坐看簷果落

題畫竹

添葉莫嫌湊立榦莫嫌瘦君看歷亂枝葉葉皆生就

登僧樓書所見

落葉擁溪流溪聲不咽秋日懸橋影瘦風逼雁行迺蕭颯空林響單寒旅客愁有人閒眺望極目倚僧樓

送席竹雲孝廉

珍

自金華移寓武林

席蕪之洞庭人

梅地詩金卷四
吾聞洞庭之山羣仙蹤夏禹素書留穴中西曰縹緲東
莫釐兩山高峙青濛濛具區三萬六千頃勝境不與凡
方同先生奠居洞庭上家世寧讓陶朱公散落長物都
不計俯飲山綠湖光空七與計偕掉頭去長風吹落芙
蓉峯偶來綢州主講席繡湖百頃生春風僕忝追隨竊
濫竽羨君多術曠發矇月旦帖帖坐諸生五經發難如
扣鐘尤工餘技擅繪事閑向溪藤掃空翠往時贈我一
幅圖淺絳之法大癡意先生論文如論畫畧貌追神別
流派春秋佳日每過從玉屑清談頗稱快五載盤桓朝

復暮聞君欲渡錢塘去亦知人生會有別此後相逢更
何處諸生戀別悉英年矧余老作沾泥絮錢塘山水饒
麗景洞庭恰與錢湖近來往好憑一葦杭到江吳地連
鄉井我從越嶠望三吳未免相疎類萍梗佇看整轡上
春明轉瞬枝頭鬧紅杏倘逢鄒律迴春風槁木猶思一
吹醒

正月十三日宿雲溪駱霞起文學家時駱方他出

後又折簡招飲因阻雨不赴爲賦長句寄之

龍旗落日鎔金盈山風颯颯吹空林怪禽啼野恐行人

僕夫望影窮追奔息肩來至水際村惟時令節近上元
山月未上野色昏穿林覓路敲君門犬聲如豹人語喧
君方有事赴城闈客來予立當籬樊通欵賴有東西鄰
應門嗣君方弱齡頭角岐嶷頰豐盈高燒絳蠟一手擎
知敬父執言笑溫焚香掃地招客魂佳肴蔬果當筵陳
枵腹一飽投重裯客枕不寐聽鷄鳴束裝戒僕出視星
不告而去忘主賓自春徂夏節序更倅來折簡招友朋
前期夙戒籃輿迎大雨如汪方時行溪橋漂失難問津
有酒不辨淄與澠知君愛客情孔殷作詩鳴謝遲至今

他時重來細論文浮我大白還開樽

兔園樂府

見舊家子有以携菹入陷穽中覆家而不知悟
者爲仿古樂府詞以哀其愚庶幾言之者無罪
聞之者足以戒云爾

紙虎泥牛作鼠竊狗偷張機設穽爲效忠取信擇肥舍
瘠剝膚吸液謂傳自盜蹠解一楚楚者子來遊來處恨相
見晚出肺腑相語有酒盈樽有肉盈俎密室談心惟予
與汝解二纍纍白鏹出於包匭携菹百萬爲子注擬諒爲

豪俠當如是矣三陰結博徒牽衣挽裾如絡套駒如釜

遊魚喝朱成碧呼梟作盧四口蜜腹劍獸心婆面非予

欲汝償爲立有左券五受宅有券買田無價聊當質劑

待汝秋稼非田宅予耽汝心自甘六腰鎌荷畚刈其穀

矣昇床毀竈入其屋矣攜子挈妻一家哭矣七有寢翼

翼有禾穰穰入其穀中十成死地既穿趙壹又尋李二

八解

繹古諺辭

千人所指無病而死人毋詭其行而顧影自喜高明之

家鬼瞰其室人毋厚其積而涼其德屋漏在上知之在

下勿謂氓之蚩蚩而狎侮鰥寡

閱蒙莊偶作

少讀蒙莊書汪洋得恣肆竒想落九天空靈噓一氣不

覺入元中掩卷索其致只是翻案耳語語求詫異尋其

歸縮處絕聖與棄智慄焉心不寧至今有餘悸

始皇治天下事事求翻案詩書恣焚燒鞭杻逞暴悍三

王五帝畧一朝盡革換扶藪監軍死趙高竊柄叛去莊

未云遠同一無忌憚放言人心熾爲法天下亂

橫地言金一各四
暴政亂一時邪說惑萬世道德五千言皆言清靜意蒙
莊激洪波其說益橫恣莊老啓申韓清靜變刻鷲遂使
刑名家輕將民命試商鞅愈肆毒爲法徒自斃哀哉三
秦民不復知孝弟孔憂攻異端孟懼禍仁義輔翼孔孟
言馬蘓繼其志
史遷云申韓皆原于道德之意東坡作韓非論以暢其旨扶摘窮變
怪筆力破餘地

冬日坐山寺作

朔風號曠野落日下饑禽木葉無留影林扉訪病僧烹
茶童汲水繞屋澗初冰不覺閒談久黃昏上佛燈

夜大雪晨起一雨卽消卽景作

龍公玉戲原無定白戰通宵頃刻過不是天花經雨散
也愁素壁浼塵多瓦溝已作空階滴檜頂猶留左紐柯
爲愛瓊翼餘屑在團成一掬手頻搓

舟行金谿夜抵客館卽事四首

灘淺沙齟舟溜急舟撇箭迴流轉盤渦舟旋目光眩放
棹入安瀾澄江拓鏡面世事波上舟卽境可觀變
瓊瓏復窈窕愛此谿上山芳條構幽壑輕雲冠岑崑昔
傳黃初平牧羊於此間不聞叱石聲流水鳴潺湲

隱約辨城闐一塔表烟霧遙見烟中人悠悠渡江去余
亦此停橈衝泥踏江路黃昏雨如麻卧聽簷溜注
中夜視星起隨班迎大憲出郭方黎明寒風刮人面巨
艦峩峩來屏息聽郵傳名紙疊魚鱗不顧閒曹掾

孤亭

古道風吹野燒紅孤亭返照夕陽空一僧筇杖歸何處
路入寒山萬木中

題畫

好山無數碧芙蓉岡上青杉澗底松看到山迴林斷處

溪雲補上兩三峯

仙山石室好樓臺有客登臨共舉杯遙指長空天水外
一痕如豆海舩來

低山如阜水拖藍此處風光我昔諳浪穩波平八百里
洞天福地是江南

江村風景無多子浦漉參差水漲回最愛霜林半欹倒
一篙撐出酒船來

觀鬪牛有感

婆人吉凶憑牛卜角鬪神祠問禍福勝則被以蜀錦綾

敗則立供几上肉又觀吳人鬪促織賭決千金空四壁
強者錮之宜窳菴弱者被放入草陌一以不材不獲全
一以不材全其天達人觀化將奚處其諸材不材之間
十月二十四日游龍迴村名觀社會過吳園歸成七
律二首東吳躍溪

曉踏寒山露濕衣半林紅葉弄朝暉坡陀回互如盤谷
岡阜縈紆入翠微社鼓鳴來桑柘暖水田穫處稻梁肥
藍輿繞出三三徑特訪高齋一款扉

寓意林泉足晏娛傳家曾不重珊瑚先生胸自藏邱壑
喬木人看似畫圖月沼舊開澄碧滿花簾新捲落紅鋪
幾回倚檻凝神處爲愛文魚個個朱

又題四絕句東躍溪

長君早歲侍

鸞坡先生豕嗣官鸞儀衛經廳待漏

金門聽玉珂花竹平安四美具

恩榮來自

日邊多

院落華燈色色新飛觴投轄愛留賓笑看殘菊西階上

瘦影伶俜似醉人

報賽十年稱一舉

綱俗作社多
十年一舉行

廣筵會食客如林扶鳩

多半窮簷叟具見先生利濟心

久耳芳名幸識荆果然心跡喜雙清憑誰繪出精廬好

月榭風亭得細評

二十六日過許琴川先生客邸歸成長句寄之

閒來覓句深閉門甕牖時作蚯蚓鳴過午飽飯出門去
披榛入郭尋許詢當軒忽見龍蛇舞細看俱是折釵股
先生翰墨老斲輪筆陣縱橫疾風雨矍鑠哉翁興未艾

約我隨場看社會我昨觀之郭西村居人競出空四鄰
有肉如坻酒如澠豕如烏糲羊如麕伐鼓撞鐘厚地動
梨園法曲一時新百日之蜡一日澤矧此十年一舉行
昇平景象在豐樂他鄉還作故鄉論是日同雲布七澤
尖風射人行不得我歸欲眠君且休試看龍公行初雪
是日天大風將雪僮糴米歸卽闔門寢矣成二絕

句

非緣畏虎關門早差勝無村得米遲不管漫天風雪盛
布衾窩裏續新詩

應門無事僮俚火落葉滿階風掃除只恨封姨太橫暴
掀帷歷亂擾殘書

庚午冬道雲溪訪駱文學霞起不遇因題二絕

三度雲溪過問津青山曲曲水鱗鱗主人不見空搔首
我與青山作主賓

晚入華堂聳四鄰美哉輪奐一時新

時方落成

昔賢有句君

應記看竹何須問主人

織婦詞

唧唧復唧唧妾機中夜織涼秋八月青燈耿幽室堂

堂復堂堂郎馬乘驪黃送郎出門去落葉鳴枯桑馬蹄
聲隆隆望郎過河梁不見馬頭塵踟躕返空房臨別記
郎語低頭事姑嫜再拜告姑嫜兒行卽還鄉春日復秋
日魚書竟沉寂重理舊流黃空堂鳴蜻蛚昨夜夢郎歸
關山阻風雪思之不能置肝腸幾決裂思郎出門時爲
郎整巾箱衣履妾手製寬窄如郎長妾身不如衣爲郎
禦寒威隻影留空閨不得相因依妾身不如履爲郎舉
玉趾屏跡閨房中不得同行止郎行如流雲雲流無定
形平康饒姝麗燕趙多佳人妾心如流水水流東注海

揮刀斷更流念君無窮已思郎郎不歸願郎音書至上
言慰高堂下有相思字載拜雙鯉魚爲我覆郎書天長
地久情永永無相渝

行路難

行路難我舊諳不在水不在山有形之險在關津無形
之險在人心人心不同如其面口中有蜜腹有劍手中
之劍猶可防腹中之劍暗中藏人生莫漫離鄉井覆雨
翻雲在俄頃蠻烟巴雨瘴江邊蜀棧秦關路八千任君
行盡天涯路不若家庭骨肉緣

前山烈女墓

烈女不知姓氏里居昔傳亂離之際爲逋寇所

掠越豪嶺

蕭暨二邑之界

而西至前山投池殞焉土人

葬之池上余表兄瞿

祖繩

立碑誌其處

生不辰傷彼姝貞烈節激頑愚一抔土山之隅是謂烈
女墓父老嘗告余曰豪嶺鬱嵯峨亂離際萑苻多有逋
寇越嶺過劫紅妝馬上駝出山谷下澗阿千金璧不可
磨給賊殺賊計不能竄身跳入清冷波姓氏里居不可
詳池上便作窀穸鄉豎之短碑三尺長前山烈女墓五

字發幽光寒松翠竹山村路至今池水留屍香

貞女行

貞女錢明府 瀛待年妾也錢鰥作令江西其家
納丁氏女將送之官而錢之凶問至丁矢志自
誓願依錢氏終焉錢老於公車當官廉潔余作
懷知詩哀其早逝茲佳貞女之有以報也爲作

貞女行

女蘿本弱植託體松柏枝松柏一朝萎女蘿無改移堂
堂錢明府作令官江西家有待年妾未覩主光儀鵬鳥

臨明府死凶問至舉家駭貞女心古井水長跪向家督
從容前致詞主面妾未見妾諾主則知幽明雖殊途一
諾不可欺願持方寸心白首以爲期白楊蕭蕭素車來
郊披麻帶經捐脂屏膏生作鬼妾箕箒是操灑掃靈帷
以永夕朝絲蘿之託矢志堅牢貞一之性達泉徹霄

殺虎行

紫巖之山北連會稽有石嶰陽者虎窟也樵夫
陳紹林傷于虎弟紹永頽然病夫也入虎穴刺
其二子猶矢志誓欲殺虎者友人陳域爲余言

作殺虎行

石嶰之陽何巉巉中有九隴并八彎山君雄據負嵎立
食人如麻視耽耽樵夫陳紹林採樵來深山攫而舐其
肉餘屍棄層巔有弟曰紹永僂背行蹢躅入山尋阿兄
道旁形赫然見屍三踴躍直將虎穴探入虎穴得虎子
聲哀號髮上指連刃之三寸七不見於菟潛身以俟穴
窅而黑深不見底腥風颼颼虎將至矣衆逐虎者罔繼
出沒以覓紹永乃在虎穴強拽以歸椎心泣血投床大
呼衝痛至骨誓欲殺虎日皆盡裂人謂紹永糾糾勇夫
及見其人病肺而癰隆然伏行橐駝則如是爲義勇勇
不可挫作殺虎行以立軟悞

打虎兒行

宗人阿順居村之下園爲罟獲以致獸厥子阿
桂挈弟往收具見一獸帖伏草間逼視之則斑
然者虎也攫其弟幾斃阿桂拳擊之虎驚竄去
以十餘齡稚子欲徒手搏虎亦一竒也爲作打
虎兒行

打虎兒餘十齡名阿桂下園人厥父曰阿順居與狐兔

鄰設施罟獲具置之行採薪父出兒往伺挈其弱弟行
踈踈兩稚子覓路披荆榛不見豐狐乃逢卧虎逼而視
之虎毛倒豎攫其弟肩兒擊以股虎驚觸林遯木葉隕
如雨翼弟出蓬藿道旁逢阿父舉手作虎勢張牙爪掀
舞村人來告予銜杯屢停醺篝燈作夜談急爲次其語
詩云每有良朋徒永嘆兄弟閱牆資外禦君不見十歲
兒徒手能搏虎

智鳥行

綢州學舍松樟古茂蒼鷹歲養子其巔烏鵲亦

占巢各東西慮蒼鷹之逼處每乳哺則更番翊
衛與蒼鷹相搏擊此出彼入此入彼出迭爲頡
頏無休息也而蒼鷹反戢翼避之若小國之隣
大國有折衝之道焉爲作智鳥行以記之

巖宮有嘉樹烏鵲巢其巔東西各哺子和鳴形鷦鷯何
處大嘴鳥翻飛來翩然占巢據其中儼若鼎足三弱之
肉強之食小大形實相逼惟時烏與鵲音噉尾脩不遑
佚朝啞啞暮喑喑護爾子衛我室輔車依唇齒接拮之
角之矯其翼更番出入周且密攫噬之技不得施弱小

相聯亦勁敵卵翼既成各飛去
勢寡不敵衆况復類分勢能一
微禽之智亦有得惜哉
戰國不講此不然何由六王畢

綢州詩 二十六韻

綢州傳舊址邑號古烏傷異孝徵秦代秦孝子顏烏人

文蔚宋唐唐駱賓王宋宗忠簡俱義烏人川原猶古昔風景入蒼涼

汜同泔濁山巒半赭黃縣門虛險隘民屋作城牆繡水

看如畫淤泥不受航亂鴉圍廢塔官舍寓僧房兩營無官署

四境安淳朴三時慶阜康賽神牛代卜神前鬪牛以上吉凶惜米

菜充糧雖富人必以菜和米作飯膏雉嘉賓饌義俗客不食雞虛設而已荆裙媵

女妝女無統綺之飾千家工牧豕無家不飼豕爲業五畝不栽桑女紅拙蠶

桑重釀無陶秫土不種秫米區畦有蜀薑烏金惟重躋工醃乾肉

市號紅玉迴留霜棗以樹頭紅者爲原紅互市囂闐闐毫釐析粃

糠只持衡作柄不信斗爲量市維用稱不信升斗俗儉勤方始民

殷樂未央燒香爭始且勝會占重陽結隊鼉鳴鼓持竿

布作幢傾城看報賽舉國盡如狂以我吹竽濫逢茲樂

歲穰硯田餘苜蓿樂部聽松篁雪積同袁臥莊虛等陸

荒綠苔無履跡落葉響空廊載酒誰交鄭談經不慕楊

梅堯臣詩集卷四
三
青山吟屈宋白日坐羲皇風土差堪記敷陳尙未詳

立夏日喜晴因懷故園

九十日春風雨橫欣逢首夏見晴暉餘花落地青苔長
新筍穿籬乳雀飛憶昔故園桑繞屋也應此日錦成圍
會稽風俗賦諸暨三如其一謂如錦之桑眠蠶老去新秧綠如此家山胡不歸

楊花四首

靈和殿裏昔依依幻作瓊花玉屑霏天女散來渾不定
兒童捉去捧還飛清迷曉露驚魂斷淡入斜陽弄影微
老去風情猶似昔頻臨官道點征衣

散亂紛紛似斷蓬飛飛作陣滿園中輕盈不待風吹汝
飄瞥旋看雪舞空碧沼無根留色相朱欄有影任西東
三春花事闌珊盡猶逐青蹊伴落紅
花散隋堤淡不收漫天清影自悠悠郵亭客過曾青眼
釣渚人驚半白頭底事蠶綿飛五夏不隨蘆雪冷三秋
牆陰剩作迴風舞惹起蜂狂與蝶愁
舊日丰姿矜袅娜至今絮影尙迷離成團慣愛侵簾幙
小點偏工着硯池到地猶存飄泊意因風更起故園思
柴桑人去風流盡竟日顛狂恰爲誰

冒暑臥病經旬不赴公會枕上日課一詩因卽事

二首

不用盧循續命湯經旬踣壁臥繩牀生憎日影緣階上
愛聽蟬鳴噪晝長枕上尋詩如短夢病中代藥是竒方
呼兒繕稿粘齋壁嚇鬼還應走且僵
蕭齋竟日一茶鐺因病偷閒脫穴忙結陣飛蚊欺破帳
窺廚黠鼠忌餘糧僵花待雨同人瘦青草如麻上檻長
自笑匡居等仲慰吾家三徑本來荒

外孫瞿金辰

男

赤城

書城

校字

龍城

金城

跋

先君子秉性好學甫弱冠先大父卽捐館舍伯叔父
又早世遂肩家政兼攻舉子業風雨雞鳴手不釋卷
曩時著有古文時藝稿多佚去存者無幾焉晚膺綢
州外史課士之暇檢故篋中得舊存韻語若干首益
以綢州近作編成四卷辛未秋先君子棄養風木愴
懷忽忽十七年矣龍城時出遺編讀之知先君子涉
歷名區登高臨流與夫往來贈答類多紀之以詩而
所蓬勃鬱積悲壯淋漓傾吐於不自己者尤在彝常

名教之間因謀諸昆季梓存家塾俾後嗣得見先人之性情節概於展卷間以誌不忘耳嗚呼墓木已拱手澤猶新校字之餘輒不禁撫卷而爲之雪涕也已

道光丁亥閏五月朔日男

龍城謹識

